

BARAZA LA WAWAKILISHI ZANZIBAR

Simu Nam. + 255 24 2230602/1

Fax Nam. + 255 24 2230215

Tovuti: www.zanzibarassembly.go.tz



SANDUKU LA BARUA 902,
ZANZIBAR

Barua Pepe: zahore@zanlink.com

HOTUBA YA MAONI YA KAMATI YA ARDHI NA MAWASILIANO KUHUSU RIPOTI YA UTEKELEZAJI WA MAAGIZO YA WIZARA YA UJENZI, MAWASILIANO NA USAFIRISHAJI

KWA MWAKA 2016/2017

Mheshimiwa Spika,

Awali ya yote, naomba nianze kwa kumshukuru Mwenyezi Mungu Subhanahu wataala, Aliejaa utukufu, ambaye ametujaalia uzima na afya njema na kutuwezesha kukutana hapa siku ya leo tukiwa ndani ya Baraza lako tukufu, tukitekeleza majukumu yetu mbali mbali ya kuwatumikia wananchi wetu ambapo leo tunawasilisha mbele yako Ripoti ya Utekelezaji wa Maagizo ya Kamati kwa Wizara ya Ujenzi, Mawasiliano na Usafirishaji kwa mwaka 2016/2017.

Mheshimiwa Spika,

Kwa moyo mkunjufu, na kwa niaba ya Kamati yangu napenda kukushukuru wewe binafsi Mheshimiwa Spika kwa kunipa nafasi hii ya kuwasilisha Hotuba hii ya Ripoti ya Utekelezaji wa maagizo ya Kamati ya Ardhi na Mawasiliano kwa Wizara ya Ujenzi, Mawasiliano na Usafirishaji juu ya Utekelezaji wa maagizo hayo kwa mwaka wa bajeti iliyopita.

Mheshimiwa Spika,

Sitatenda haki ikiwa sijamshukuru na kumpongeza Waziri wa Ujenzi, Mawasiliano na Usafirishaji pamoja na watendaji wengine wote wa Wizara hii kwa mashirikiano yao ya dhati kwa Kamati wakati wote tulipokuwa tukipitia na kujadili Maagizo hayo.

Mheshimiwa Spika,

Aidha, napenda kutoa shukurani za pekee kwa Waheshimiwa Wajumbe na Makatibu wa Kamati yangu, ambao tumeshirikiana bega kwa bega katika kupokea kujadili na kuyafanyia kazi Ripoti hii ya Utekelezaji wa maagizo ya Wizara hii.

Mheshimiwa Spika,

Kwa kuwa naheshimu michango na mapendekezo pamoja na ushiriki wao kikamilifu, naomba niwataje kwa majina Waheshimiwa Wajumbe na Makatibu wa Kamati hii ya Ardhi na Mawasiliano ya Baraza la Wawakilishi kama ifuatavyo:-

1. Mhe. Hamza Hassan Juma	Mwenyekiti
2. Mhe. Suleiman Sarhan Said	M/Mwenyekiti
3. Mhe. Nassor Salim Ali	Mjumbe
4. Mhe. Said Omar Said	Mjumbe
5. Mhe. Mohamedraza Hassanali	Mjumbe
6. Mhe. Kadija Omar Kibano	Mjumbe
7. Mhe. Mwanaidi Kassim Mussa	Mjumbe
8. Mhe. Ahmada yahya Abdul-wakil	Mjumbe
9. Ndg. Fatma Omar Ali	Katibu
10. Ndg. Mwanaisha Mohammed Kheir	Katibu

Mheshimiwa Spika,

Baada ya Maelezo hayo kwa ruhsa yako sasa naomba niwasilishe kwako Ripoti ya Utekelezaji wa Maagizo ya Wizara ya Ujenzi Mawasiliano na Usafirishaji ambapo jumla ya maagizo 48 yaliwasilishwa kama ifuatavyo:

Mheshimiwa Spika,

Agizo nambari 2, Moja kati ya agizo lililotolewa na Kamati kwa Wizara ya Ujenzi, Mawasiliano na Usafirishaji kwamba ifikapo mwaka wa fedha 2017/2018 Bodi ya Condominium iwe tayari imeshatengewa fungu kwa ajili ya utekelezaji wa majukumu yao.

Mheshimiwa Spika,

Chakusikitisha Bodi hii ilianzishwa kwa mujibu wa Sheria ya Condominium Act No. 10, 2010, Bodi ambayo hadi sasa nawasilisha hotuba hii ya utekelezaji wa maagizo haijawahi kufanya kazi hata siku moja.

Mheshimiwa Spika,

Kamati inashukuru kwamba kwenye bajeti hii kuwa wametengewa fungu maalum katika bajeti ya wizara lakini bado hadi leo bodi hii haijaanza kazi zake, kutokana namustakabali huo kamati yangu inaitaka bodi hii ifanye kazi zake mara moja kwani kuchelewa kufanya kazi nikuikosesha Serikali mapato ambayo yangelipatikana kupitia ada za majengo mbalimbali ya Serikali.

Mheshimiwa Spika,

Pamoja na hayo, kuna baadhi ya nyumba za gorofa ambazo wapangaji wake wanamiliki sehemu tu yamajengo hayo jambo ambalo linaleta usumbufu wa kuzifanyia matengenezo nyumba moja moja na baadhi ya wakubwa kukataa kulipa kodi ya matengenezo za nyumba hizo.

Mheshimiwa Spika,

Agizo nambari 7, Utekelezaji wa agizo hilo haujakamilika kwakuwa Shirirka bado linaendelea na Utungaji wa Kanuni ambayo itasaidia kurahisisha utekelezaji wa kazi za Shirika. Kutokana na kutotekelezwa ipasavyo agizo hilo Kamati bado inaiomba Wizara kwa kushirikiana na Shirika la Nyumba kuharakisha kukamilika kwa Kanuni hiyo ili kuipa nguvu Sheria husika kuweza kutekelezeka kama ilivyokusudiwa. Kushindwa kufanya hivyo ni kuikosesha mapato Serikali yatokanayo na Kodi za Nyumba za Serikali pamoja na za wawekezaji binafsi katika sekta hii.

Mheshimiwa Spika,

Agizo nambari 11, Utekelezaji pia wa agizo hilo haujakamilika kwakuwa wataalamu kutoka UNESCO wanatarajiwa kuja tarehe 30/9/2017 hadi tarehe 3/10/2017 ambapo mazungumzo ya miradi yote ya Mji Mkongwe yatafanyika. Aidha, Kamati inaendelea kusesitiza kuharakishwa kutekelezwa kwa mradi wa Beit – Iajab.

Mheshimiwa Spika,

Agizo nambari 13, Utekelezaji wa Agizo hili pia haujakamilika kwakuwa kilichofanyika ni marekebisho madogo madogo tu ya Idara kwavile hakukuwa na fedha zilizotengwa kwakazi hiyo wakati kamati ilipotoa maelekezo. Aidha, kamati inashauri wizara kukaa pamoja na Idara ya Leseni kuandaa tena mpango wa muda mrefu wa kulikarabati jengo la idara ya usafiri na Leseni ili lisiendelee kuharibika hasa nyakati za mvua.

Mheshimiwa Spika,

Agizo nambari 14, Agizo hili halijakamilika utekelezaji wake kwa kuwa hadi sasa idara haina mitaala na pia imeshindwa kuandaa mitaala ya mafunzo ya udereva. Aidha, Kamati imeshauri kutoa mtaala maalum kwa Madereva wote wanaoendesha viongozi wa Serikali katika vyo vyetu vilivyopo Zanzibar na sio kwenda Tanzania bara.

Mheshimiwa Spika,

Agizo nambari 15, Agizo hili nalo halijafanyiwa kazi kwakuwa hadi sasa idara imeshindwa kufanya ukaguzi wa mara kwamara kwa vyombo vya moto vya barbarani pamoja na madereva.

Mheshimiwa Spika,

Agizo nambari 16, Agizo hili halikamilika utekelezaji wake kwa kuwa kanuni bado ipo katika hatua za kusubiri kuwasilishwa Serikalini. Kutokana na jibu hilo Kamati inaishauri Wizara kwa kushirikiana na Idara ya Usafiri wa Leseni

kuharakisha utekelezaji wa Kanuni hiyo ili kuweza kurahisisha kazi za Idara hiyo.

Mheshimiwa Spika,

Agizo nambari 17, kwakuwa usafiri wa bodaboda umeanza kushamiri hapa Zanzibar Kamati inaitaka Idara kuweza kutoa leseni maalum za kusafirisha abiria ili kuweza kuwadhhibiti kwakulinda usalama wa abiria na kuepusha ajali kwani hivi sasa wanapakia abiria bila ya kuwa na leseni ya kuwapakilia abiria jambo ambalo iwapo itatokezea ajali hakuna sheria au kanuni ilioruhusu kubeba abiria, lakini pia zikitoka leseni za bodaboda itakuwa ni rahisi kuweza kumtambua mmiliki wa chombo iwapo kitatumika kwa vitendo viovu ikiwemo uhalifu au magendo.

Mheshimiwa Spika,

Agizo nambari 25, Kamati imefanya jitihada za kwenda Tanzania Bara kuonana na Katibu Mkuu wa Wizara ya Fedha na Mipango ya Serikali ya Jamuhuri ya Muungano wa Tanzania ili kujua nini tatizo la kukwamishwa upatikanaji wa fedha za kumalizia barabara hii. Wakati nusu ya pesa zipo tayari kutoka “BADEA” tatizo ni nusu ya pesa zilizobakia kutoka SAUDI FUND, wakati pesa zipo za Serikali ya Saudia lakini hadi leo haijatoka ruhusa ya kupatikana kutoka kwa Katibu Mkuu wa Wizara ya Fedha na Mipango wa Serikali ya Jamuhuri ya Muungano wa Tanzania.

Mheshimiwa Spika,

Agizo nambari 27, Utekelezaji wa Agizo hili bado unasuwasuwa hali ambayo imepelekea Kamati kutofurahishwa hata kidogo kuona kwamba hadi leo Bandari zote pamoja na Minara ya kuongozea Meli kwa upande wa Unguja na Pemba kukosa Hati Miliki za maeneo hayo.

Mheshimiwa Spika,

Chakushangaza maeneo ambayo yamekosa hatimiliki ni maeneo yanayoingiza pato la Nchi yetu. Je? Hatuoni kuwa tunaikosesha Serikali kuingiza mapato kiukamilifu kupitia vianzio hivyo.

Mheshimiwa Spika,

Kutokana na hili Kamati inaitaka Wizara ya Ujenzi, Mawasiliano na Usafirishaji kukaa pamoja na Wizara ya Ardhi, Maji, Nishati na Mazingira kuweza kulitafutia ufumbuzi suala hili kabla ya kumaliza bajeti ya 2017/2018.

Mheshimiwa Spika,

Agizo nambari 38, Pamoja na Kamati kufika Tanzania Bara kwa nia ya kukutana na Katibu Mkuu Wizara ya Fedha na Mipango kupata Usahihi wa tatizo hili, kwasababu anazozijua yeye mwenyewe Katibu huyo alishindwa kutenga muda wa kukutana na Kamati.

Mheshimiwa Spika,

Kusema kweli kamati haikufurahishwa na kadhia hii kwakuwa ni miaka tisa sasa ukamilikaji wa jengo la Terminal II haujaleta sura hali ambayo inapelekea kurudisha nyumba maendeleo ya Nchi ya Zanzibar.

Mheshimiwa Spika,

Mwisho napenda kuwashukuru na kuwapongeza tena viongozi na watendaji wa Wizara hii kwa juhudi wanazochukua katika kutekeleza kazi zao pamoja na ushirikiano wao kwa Kamati hii. Aidha, nawashukuru Waheshimiwa Wajumbe wa Baraza lako Tukufu kwa kunisikiliza kwa makini na utulivu wa hali ya juu wakati wote nilipokuwa nikiwasilisha hotuba hii.

Mheshimiwa Spika,

Naomba kuwasilisha.

Ahsante,

.....
Hamza Hassan Juma,
Mwenyekiti,
Kamati ya Mawasiliano na Ujenzi,
Baraza la Wawakilishi,
Zanzibar.